

Plenchi

Bèl a bati

Tring tring tring yega pa nos por interkambia. E resultado di prome temporada di examen ta aden. Awor ta di warda her pa nos tin e resultado final pa skolnan. Efo tambe ta yegando nan dia pa haña resultado. No ta falta hopi mas pa nos por sera e aña eskolar aki. Nos tin e ultimo pesonan ainda pa hisa pone pa nos por hala un rosea i sera e aña tras di nos lomba. Pero manera aña sera nos tin ku prepará pa e aña nobo. Ta trabou tin paso un bon preparashon ta di sumo importansha pa un bon ehekushon. Paso semper tin kosnan ku ta kue di sorpresa, si kosnan no ta prepara nan ta brua henter bo planning i trese basta problema. Pues plania i sea prepará pa sorpresa tambe. Mañan ta dia di tata. Un dia pa nos reflekshoná mas aun riba balor di nos tata i duna su atenshon i kariño. Nos por ta kontentu i orguyoso ku e desaroyo di nos tatanan. Nos tin e impreshon ku e kantidat di tatanan ku no ta preokupá pa nan yunan of no ta buska nan drechi a baha. Asina bo tin yu bo ta bin na di 2 of di 3 lugá. Bo tin ku pone bo yunan promé den hopi kos. Hasi hopi sakrifisio pa nan sin niun interes pa bo mes. Pues bo mes egoismo of bo mes interes no por stroba esun di bo yu. Nos ta mira tata ku ta brasa nan yu, ku ta papia ku nan yu. Tata ku ta aktivo tur dia den edukashon di nan yu. Esei ta masha bunita i ta duna un balansa entre e mama i e tata. Sea bo ta na kas ku e yu òf no, bo por ta importante den su bida. No usa esaki pa ekskus pa bo no ta involvi. Laga kompronde ku bo tei pe i ku bo ta stimé i ke soru pa e ta bon. Esei no ke men, keda leu i dune material so. No ta bai pa material. E por pidi bo esei pero esei no ta e nesidad. E tempu pe e amor i pasenshi. Traha tempu pa boso ta huntu pa komparti momentunan dushi i menos dushi. Bo sa ku bo ta riba bon kaminda ora bo yu ta bin sserka bo ora e ta preokupá, of desespshoná. Ora el a kometé un akto robes anto e sa ku bo tei pa tende i konsehe. Mustre riba su fout pero tambe yude korigí kualke situashon i preveni fayonan den futuro.

Not' é riba bòrchi Rigelys Provence di Fr. Evonius school



Djadumingu 5 di yùni tabatin un tremendo konkurso di diskurso (spich) pa skolnan spesial. E konkurso aki a ser organisa dor de e dinámiko yùf Renate Joe .

Tema di e diskurso mester ta :”kiko mi ke dira dia mi bira grandi “
Nos ta sumamente kontentu ku e ekselente partisipashon di Rigelys Provence, di Frater Evonius school (RKCS), ku a resultá e ganador absolute I tambe a bai ku e premio di mihó aktuashon.

Di e forma nos ke keda stimulá tur nos alumnonan di enseñansa spesial , ku semper a demostrá di tin basta talento pa sigui desaroyá esaki.

Rigelys ta gusta baila i esaki tabata tema di su spich. Durante di lèsnan di aktividatnan kultural artístiko, maestro(a)nan por deskubrí e diferente talentonan serka e alumno. Fratervonius school ta felisitá tur e alumnonan di e diferente skolnan ku a partisipá pa asina nan por sigui kere den nan mes i progresá ku yudansa di skol i nan mayornan





Den agènda

Dianan liber di skol

- **Fakansi grandi 4 yuli te ku 10 ougustus 2016**

Konferensha pa personal skolnan katólíko 8 di ougustus 2016

Promé dia di skol pa alumnonan ta 11 di ougustus 2016.

Mi ta konta

Un regalo presioso

Marko a disidí pa dia di tata e duna su tata un atenshon speshal. Marko mes ta tata di 3 yu, e sa ku nan lo ke tiné rondó di dje pa nan dune atenshon. Pero el a palabrá ku for di trempan lo e buska su tata for di Ricardus tehuis pa e pasa huntu ku nan. Asina a sosodé ku papa Tony a bin for di mainta 9 or serka su yu na kas. Nan a prepará pa risibie i nan a palabrá ku e lo ta e figura prinsipal. E muchanan a kanta pa e 2 tatanan, nan a balia i duna regalo.

Papa Tony tabata felis ku e atenshon. Merdia e tabatin mag di sinta na kabes di mesa i su yu a sinta na e otro banda di mesa. Nan a kome i kombersá ku masha smak. Papa Tony a kuenta su nietunan historia di antes. Kosnan prèt ku nan tata a hasi i tambe travesuranan. E muchanan a disfrutá di nan papa Tony i na final di e dia a puntré ki dia e ta bin atrobe.

E pregunta ei a habri un mundu nobo pa e famia kompleto. Mesora Marko a bai papia ku su kasa i nan a bin bèk i anunsia e notisia ku a kai masha na agrado. Tur djadomingu nan lo trese papa Tony kas pa pasa ku nan. Papa Tony su wowo a yena ku awa, e no a spera un regalo asina grandi. Marko tabata felis paso porfin e por hasi bèk pa su tata maske ta algu chikitu. Paso kompará ku e sakrifisionan di su tata pé, e gesto aki ta ñaña. Anto e manera ku su yunan i kasá a trata su tata, ku amor i pasenshi a pone ku el a sinti ku e tambe tin un regalo masha presioso. El a gradisi Dios pa duné mama i tata ku a dune amor i a formé. Maske su mama no tei mas, semper e ta tende su stèm resoná den su kurason diferente momentu di su bida. Su tata danki Dios ta na bida, ku su krekechenan, pero e tei pa e por debilbé algu di e amor i sakrifisio ku su tata tabatin pé. El a gradisi Dios pa su kasá i yunan ku ta su tesoronan di mas balioso.

Un preñchi



Funshonario Diamela Martis a kumpli añã i e hobenan di Alablanka school a bin dune un hobenahe masha spesial. El a keda ta hari so ku su sorpresa. Danki na e dinamiko lidernan di e hobennan talentoso aki.

Mucha djispou

Den temporada di sekura, hendenan a reuni pa resa pa awa por yobe. Un di nan a bin ku su paraplu. Esei yama FE

Ora un tata tira su yu den laria, e yu ta hari ku goso paso e sa ku su tata lo fangu e. Esei yama KONFIANSA

Tur anochi ora nos subi kama nos ta pone alarma pa lanta nos mainta, sin sa sigur ku nos lo tin rosea. Esei yama SPERANSA.